



清刻龍藏佛說法變相圖

二經同卷

初三

菩薩五法懺悔經

菩薩藏經

菩薩五法懺悔經^{初三}

失譯師 名開元 附梁錄

十方三世佛五眼照世間三大無不知明見
 罪福相弟子某甲等從無數劫來不遇善知
 識造作一切罪破戒犯四重六重及八重謗
 法斷善根具足一闍提幸遇諸如來經法賢
 聖眾能除眾罪者弟子頭面禮願諸惡雲消
 令發無上慧懺悔竟五體作禮
 十方諸佛始登道場觀樹經行未轉法輪無
 明老死長夜可悲願設法藥救諸疾苦法雨

流布枯槁衆生得道明了十方現在佛已度
有緣者衆生多懈怠方便現沍洹弟子誠心
禮請佛令久住一切諸菩薩已發無上意願
勤加精進於無佛世界現成等正覺普度諸
羣生慈哀無過佛是故至心請請佛已竟頭
面作禮

歷世懷嫉妬我慢及恚癡見人得利如箭射
心聞人得樂如釘入眼坐此諸罪障墮落三
惡道常不遇諸佛今日一心悟發大隨喜心
十方三世佛及德弟子衆其數無有量從初
發一念乃至坐道場四等大布施清淨持禁
戒定慧及解脫無量諸知見弟子悉隨喜慧
心朗然明愚癡闇障滅一念發隨喜功德滿
十方智慧如諸佛隨喜已竟五體作禮
往返生死中從生故至死從貴故還賤惟未

得泥洹法身常清淨般若妙解脫今當求此
利所可有福業一切皆和合迴以施衆生共
成無上道廣大如虛空無相如真智究竟盡
法界金剛空慧常現在前無行神通有感必
應迴向已竟頭面作禮

誠心發大願行道誓願慧心如猛風定力如
金剛於此迴向後念念轉慈悲捨離愛著想
歡喜度一切捨去身命時佛放光明滅除一
切難障化生兜率天面觀慈氏尊衆相盡具
足六根普聰徹聞佛說妙法即悟無生忍皆
住不退地乘大神通力周遊十方國供養一
切佛無量妙音聲讚歎佛功德二十五有中
無時不現身如日照世界光明朗十方一切
幽闇處皆爲作燈明雖得佛道轉法輪現泥
洹衆生不盡成佛不捨普賢文殊願發願已

竟洗心作禮

菩薩五法懺悔經